

Mirugia de Cuba, celebrando su 40 año di bida y 35 año cantando



Mirugia de Cuba, no ta un figura desconoci den e mundo di canto y farandula local. Cu su 5 año Mirugia a cuminsa bay les di canto participando activamente den coro Tutti Frutti b.d.d. Maybelline Arends Croes.

Aki el a canta como solista na diferente ocasion manera entre otro hotel, na television, na misa y otro sitionan.

Cu apenas 7 año el a bay Corsow y Boneiro pa canta den Festivalnan di Canto y

un poco tempo despues el a graba un disco 45 cu dos cancion na dje, esaki ta un tema titula "Ban bali'e" di e conocido Etty Toppenberg y "Ban Progresá" di Martha Figueroa.

Mirugia tabata integrante di "The Young Voices", cu a viaha pa Sto. Domingo pa duna diferente presentacion, despues el a haci varios grabacion den liña di coro riba e disconan di "Pierewietje".

Como solista el a canta

manera entre otro "Mi cas di popchi" y "Bini hunto" ambos compone pa Martha Figueroa. Despues el a forma parti di e grupo "M.I.S.S." cu tabata presenta "Potpori" di cancionnan di temporada di fin di año y cancionnan popular. Na su 15 año di edad el a dicidi di sigui den canto definitivamente como solista. E tempo ey e tabata busca un persona pa traha su acompañamento musical y asina e detaye aki a wordo consolida. Mirugia a cuminsa canta na diferente bruid, show na hotel y television.

Cu 20 año, Mirugia tabata tin e deseo di bay studia na Berklee College of Music na Boston, pero prome cu el a bay Mirugia a pasa de un programa di 5 (cinco) siman y a gusta mas e tereno aki. Asina cu Mirugia a bin bek el a buska un manera pa haci su estudio final na Berklee.

Algo inolvidabel p'e t'e dia cu e cantautor di e banda The Polis esta "Sting" a entregue su diploma den man. Despues


di su estudio el a haña trabao cu "Suntamers" na Aruba Beach Club cu e maestro Amado Rosina.

Despues di esey Mirugia a wordo scucha pa un di e integrantenan di "J.E.M.M." cu a sera conoci cune na ABC y ta bay cune pa canta den "The Cellar" e tempo ey.

Cu e banda "J.E.M.M." el a bishita Corsow y Boneiro na diferente ocasion p'e celebracion di Regatta y nan a haci diferente grabacion pa cual di aki a sali un produccion completo. Na 1996 Mirugia a produci su prome CD "Nine months" cu a resulta un exito na Aruba. Y cu e cancion "Pordona'mi" cu ta aparece riba e album menciona el a ricibi e premio como "Cantante femenino di e año" e tempo ey. Actualmente Mirugia ta cantando cu su propio banda cu yama "So What!", esaki ensambla for di 1998, pero esaki no ta kita cu e ta colabora cu entre otro e banda J.E.M.M., 2 Acoustic, ½ Step down y duo M&M.

Mirugia cu esaki kier a gradici tur compositor cu a yega di skirbi cancionnan p'e y tambe tur musico cu el a yega di canta cu y pa nan.

Pa awe e ta celebra su



trayectoria c'un compilacion di 28 cancion pa un recuerdo p'e comunidad di Aruba, na tur radio station e recuerdo di tur su temanan cu el a yega di canta lo ta inmortalisa riba un disco compacto.

Mirugia ta spera cu DJnan, Locutor, programador y tur esan cu ta traha den media aprecia e gesto aki y draai esaki tambe, aunke e no ta obligatorio. Tin cancionnan di mucha, balada, jazz, reggae, pop y rock, un variacion completo di e trayectoria musical di Mirugia.

Na tur su fananaticonan Mirugia ta manda 1 Miyon di danki pa ta semper presente unda e ta canta, boso ta super den boso apoyo!

Mester menciona si cu ayera anochi nos por a scucha Mirugia na South Beach Mall den Café Rembrandt.